



Vicecampiun grischun cun l'arma da militar duas posiziuns: Hermann Jemmy.



Ils trais meglers tiradurs giuven: Mauro Ardüser, Robin Studer e Matthias Schrämli (da san.).



L'elita grischuna sin la distanza da 50 meters pistola: Guido Zellweger, Elmar Fallet e Stephan Lehmann (da san.).



Els trais han dominà la categoria duas posiziuns cun l'arma da sport: Christian Felix, Georg Maurer ed Otto Bass (da san.).



Onur per quellas duas tiraduras e quel tiradur: Anna Laura Klucker, Marie-Louise Degonda e Domenic Lorenzetti (da san.).



Sin il podest en la categoria arma da militar en venter: Tarcisi Cadruvi, Urs Nauli e Carl Frischknecht (da san.).

FOTOS G. N. STGIER

## Intgins favurits han gi ferma concurrenza

Tir: Campiunadi grischun

DA GION NUTEGN STGIER / ANR

■ Per ina giada han ils gronds favurits tratg main precis e cun las frastgas en ids auters tiradurs. Tranter quels cun Remo Capeder e Robin Studer er dus Sursilvans. Ina classe per sasez è stà Elmar Fallet sin las distanzas da 50 e 25 meters. Sco savens al Rossboden a Cuira èn las relaziuns er stadas sonda passada fitg pretensiusas. Cun adina puspè sa midar la glich è strusch stà pussaivel da sajettar meglie. Tuttina è il nivel stà fitg aut e darar è er la tensiun stada uschè gronda sco tar quel campiunadi grischun, en spezial sin la distanza da 300 meters. Hubert Tomaschett, il schef da la partizium tir da matsch tar la Societad grischuna da tiradurs, è sa mussà ventiraivel cun sa participar a l'occurrènza prest 140 tiradurs.

### Surpraisa entras Benno Gruber

Cun l'arma da standard era Georg Maurer da Favugn il grond favurit e quai gist en omaduas categorias, en venter e lura er tar la concurrenza da duas posiziuns (en venter ed en schanuglias). Gudagnà la categoria en venter ha Benno Gruber da Farrera e quai cun 587 puncts. Il tiradur da 40 onns ha fatg in punct dapli che Georg Maurer e procurà per ina gronda surpraisa. Cumplettà il podest ha lura Urs Beat Waser dad

Andeer che ha obtegni 584 puncts. En la concurrenza da duas posiziuns è lura Georg Maurer stà quel tiradur che ha sajettà cun 577 puncts ils pli blers. Segund è vegni cun 570 puncts Christian Felix da Haldenstein e la medaglia da bronz è ida ad Otto Bass da Rabius che ha fatg 560 puncts.

### Per l'emprima giada campiun grischun

Dominà la categoria cun l'arma da militar en venter ha Urs Nauli. Il tiradur da Tumeigl ha tratg excellent e fatg cun 60 culps total 575 puncts. Quai èn diesch dapli che Tarcisi Cadruvi da Ruschein ch'è vegni vicecampiun grischun. Mancà da far la medaglia d'argient be per in punct ha Carl Frischknecht da Tumeigl sco terz. Ina vaira surpraisa è segir la victoria da Remo Capeder da Duin en la categoria duas posiziuns (en venter ed en schanuglias) cun l'arma d'ordonnanza. Il giuven da 24 onns ha tuttina tratg cun 539 puncts pli ferm che Hermann Jemmy (535 puncts) e Robert Studer (533 puncts) da Castrisch, omadus corifeas en il sport da tir en noss chantun.

### Victoria dubla per Elmar Fallet

Urs Nauli sco er Remo Capeder èn per l'emprima giada campiuns grischuns en la categoria singul arma da militar. Ferma lu-

ra la presatzium dad Elmar Fallet da Müstair sin las distanzas curtas. Il Jauer ha gudagnà omaduas occurrenzas e quai en moda suverana. En il program C, 25 meters, ha el sajettà cun 584 puncts in nov record grischun ed è daventà campiun chantunal avant Guido Zellweger da Zernez che ha tratg 57 puncts. Il terz post va cun 568 puncts a Sofie Lehmann da Cuira. Sin la distanza da 50 meters è Elmar Fallet vegni emprim cun in total da 573 puncts, ditg auter cun in avantatg da 13 puncts sin Guido Zellweger. Cun 558 puncts ed uschia vegni terz è Stephan Lehmann da Cuira.

### Victoria per Degonda e Casanova

En la categoria arma da sport 50 meters è la tensiun stada immens gronda. Il culp supplementar ha a la fin decidì a favur da Marie-Louise Degonda da Cumpadials. Ella è daventada campiunessa grischuna en la categoria elita e quai cun 206,5 puncts. Gist tants puncts ha lura er sajettà Anna Laura Klucker da Tumein che ha fatg en il culp supplementar be 10,1 puncts, sia concorrenta Marie-Louise Degonda dentant 10,3 puncts. Campiun grischun tar ils veterans è vegni Geli Casanova da Vattiz e quai grazia a ses 197,1 puncts. Vicecampiun grischun è daventà Josef Eugster da Suffers (196,6 puncts) e terza è lura Irena Cagienard (174,3 puncts) da Cuira.



L'occurrènza da veterans han dominà: Josef Eugster, Geli Casanova ed Irena Cagienard (da san.).